

露

書

露書卷之四

莆田姚旅園客撰

韻篇中

朱淑真武林人負詩名然閱其斷腸詩集多陳氣唯
七言絕句如春日雜書云春來春去幾經過不似
今年恨最多寂寂海棠枝上月照人清夜欲如何
中秋聞笛云誰家橫笛弄淒清喚起離人枕上情
自是斷腸聽不得

金谿節婦黃嗣真初生之夕父夢人授以玉鏡因名

日玉娘少遇子史且攻詩詩不多見如味鏡中燈
云寶炬菱花共照臨
影沉沉五更滄海
涵晴旭半夜金星犯太陰翠袖拂塵紅燄冷朱唇
呵霧碧光深任收撩亂飛瓊撲撲難滅虛明一點心
雖善體物亦自鳴其心耳及讀其漁村唱晚曰網
影垂簷江樹空晴川隱映落霞紅欲知千古滄浪
恨盡在斜陽款乃中則令人淒絕矣

姑蘇陸卿子趙凡夫內子也著考槃集玄芝集與范
長倩內子徐氏一時兩秀文采相映兩人又相得

最歡徐隨范宦滇南陸有山中憶范夫人詩云相
送還憐踏鴈沙相思何處望天涯無情最是溪頭
月獨照寒梅一樹花又酬范夫人詩云萬壑松風
萬壑秋一聲啼鳥一聲愁愁心欲寄憑誰寄寄與
溪頭帶淚流其韻致逼人

陸氏嘲女巫詩薜荔爲衣電作軀形容應是與人殊
不知若箇爲媒妁能使娥皇嫁有虞 漢女蠻言

僞作真幾回白眼望他人不奈重乞天孫巧祇學
琵琶可賽神 歲暮家家開綺筵蒲堂華燭晝生

煙五郎盡有諸姬侍會問佳人若箇邊女巫宦族
女也筆端游戲可謂無作者

陸氏贈徐夫人詩爲帶口脂時避飲不妨眉黛倩重
描寫態如畫

徐媛字小淑范長倩少參夫人也詩文與陸卿齊名
然徐以綺麗勝才情稍遜於陸所著絡緯吟四冊
余獨愛其別曹娘詩云木落西風萬壑幽忍將離
思爲君留碧雞關外淒涼月偏向蠻雲夜夜秋
江上青楓一葉輕停撓不敢問前津山深自是無

楊柳折得桐花寄遠人又春日四弟招飲舟過虎
正詩云雨微風細漾輕流載酒尋芳郊外遊花草
吳宮渾一夢白公堤畔木蘭舟 清溪小築雨中
樓目送春帆帶雨流自古貞娘冷香骨殘英飛盡
故宮秋此四首獨以情勝卽董斯張所謂其爲絕
也蓋賢乎其爲近體也

溫太學婦吳氏歸安公擇駕部女善詩兼博覽書史
嘗在父金陵官舍送父允兆詩曰官舍知秋早
那禁骨肉離長江望不到風雨細帆遲

吾鄉黃漢薦名幼藻蘇州別駕議之女嫁林儀部仲
子丰姿韶秀十三四工聲律兼博子史所著柳
絮篇有沒之者余索之未得第所傳偶賦四景夏
景云深院塵消散午炎閨情似水淨粧奩綠池苗
苗輕風送獨愛香來爲捲簾冬景云蕭索隆冬百
事閒白茅簷外雪漫漫此身香閣堪誰比曾許梅
花共歲寒詠雪云鶴舞玄空玉洞幽瓊花清樹暎
琉璃銀城浩蕩乾坤淨萬里寒生月一鉤雨中看
紫芍藥云枚樓初下白傾城并香生繡戶清厭

說廣陵春色暮胭脂和淚雨中傾恨白芍藥不開
云萬種花開闌曉紅含羞無語倚東風素妝不理
因誰倦一段春藏粉黛中明妃曲云琵琶一曲度
龍沙悔入宮中鬪麗華萬里孤身雲外隔恨教奴
虜作夫家 其二 天外胡風滿面沙舉頭何處是中
華早知身被丹青誤但嫁巫山處士家其麗才雅
藻何減梅妃惟是妍奇貧一生寥落三十九而卒
卒時猶誦殘燈無焰影幢幢悲夫

黃漢薦有竹枝詞云家住橫塘白石磯門前春水浣

羅衣朝來繫著木蘭棹閒看鴛鴦作隊飛

其二 昨

夜燈花燦紫缸今朝喜鵲噪紗窗可中三日郎相
見重繡麒麟錦帶雙按前一首桃花仕女詩也景
泰間紹興葛崇有桃花仕女古畫崇對之戲曰誠
得是女捧觴豈吝千金夜飲半酣見一美姬進曰
日間重辱垂念茲持歌以侑觴連詠百絕中一首
與首作同只橫塘作東吳春水作流水見艷異編
想好事者竄易二三字託漢薦以眩人第二首亦
古作但不記爲伊誰嗟夫漢薦真作爲人埋沒今

徒盛傳其賡安得起漢薦而問之

丘慧貞字法融建昌府丘蘭別駕女歸益藩輔國將軍常衆其詩多佳如月下溪聲云溪添一夕雨瀉出萬端轂夜雨與君侯分韻云所欣今夕雨相對古爐烟夏日云不知愁裏事渾向夢中過新涼晚眺云牕陰雲忽到山霽雨初收皆廻出閨流

鄧遠游杜史夫人朱氏南昌宗室女也善詩寄遠游詩云春早梅花風故剪秋深蕉葉雨偏警

新建文學丁立祺妻姜氏方伯春雨之女孫也寄文

學山居詩云何必入山深居然似漢陰雨殘雲在
竹野曠日平林負郭多幽事爲農長道心芸窗開
卷罷多是聽鳴禽姜兼善制舉稚生萬曆己丑而
卒於庚申有才無年惜夫

許氏朝鮮國狀元許筠之妹也自號蘭雪主人七歲
能詩十二歲擬李長吉作上梁文藻思蒨麗女神
童也適金誠立進士不見愛故哀怨每形之詩篇
余採其一二令觀者知外國有人焉其寄女伴詩
云結廬臨古道日見大江流匣鏡鸞將老圓花蝶

已秋寒山新過鴈暮雨獨歸舟寂寞窗紗掩那堪
憶舊游其和孫內翰北里韻云旭日紅欄上玉鈎
丁香葉葉結春愁新粧滿面貪看鏡殘夢關心懶
下樓夜月雕牀寒翡翠東風羅幙引簷簷媽紅落
粉堪惆悵莫把金盆洗急流其遊仙曲云烟淨遙
空鶴未歸白榆陰裏閉朱扉溪頭盡日神靈雨滿
地青雲濕不飛其莫愁樂云家住石城下生長石
城頭嫁得石城婿來往石城遊

周潔字玉如秣陵江東門胭脂巷人嫁京兆張羽王

有雲巢集其望秦淮云秣陵無處望離水正前流
何不教東下將心到石頭

秣陵張氏博士馮問奇寵姬也家富博覽能詩父嘗
有事繫獄問奇爲救解父德之因以歸問奇余從
問奇索其著咏問奇謂雜在瑯嬛集中如用古人
名詩及女史序皆其作也先以梁詩少而附益之
容分別相示越數月而問奇化爲異物無從質証
今據所云擇其一二載於此山居云住山不用買
山錢起見紅藍遶碧山濤韻粼粼清若許行看淨

月印溪間寄郎云羞把梅花額上粧歌韻怯怯杜
蘭香別來肥瘦何須問繡帶而今幾許長春來
贏得小宮腰淡淡纖眉也懶描欲笑欲啼俱未得
鳥鳴花落送良宵

有會稽女子題詩新嘉驛無從問名姓故只稱會稽
女子詩云銀紅衫子半蒙塵一盞孤燈伴此身恰
似梨花經雨後可憐零落舊時春終日如同虎

豹遊閒情默坐恨悠悠老天生妾非無意留與風
流作話頭萬種憂愁訴與誰對人強笑背人悲

此詩莫把尋常看一句詩成千淚垂末自敘云余生長會稽幼攻書史年方及笄嫁與燕客嗟林下之風致事腹負之將軍加以河東獅子日吼數聲今早薄言往憇逢彼之怒鞭箠亂下辱等奴婢余氣溢填胸幾不能起嗟乎余籠中人耳死何足惜但恐委身溝壑湮沒無聞故忍死須臾俟同類睡熟竊至後亭以淚和墨題三詩于壁并敘出處庶知音讀之悲余生之不屈則余死且不朽嗟夫婦人負才藻如此爲人作妾猶不聊生才士之蘊寶

巖穴辱於奴隸亦若是矣讀之令人淒然

徐安卿姑蘇人美丰姿善寫蘭竹梅花且善書余嘗
於戚不磷齋頭見之詩亦楚楚嫁一書生以失德
出之復歸海寧陳太學爲妾太學就選長安安卿
因與其親太學陳三郅憐陳三之麗容也爲其夫
所執三得脫去乃率弟兄斃其夫安卿與三以是
坐極刑當秋部堂上面試有詩一時傳誦今失記
或爲作傳謂卽會稽女子之題詩新嘉驛者誤會
稽女子嫁武人安卿嫁太學會稽同行有正室安

卿獨與太學俱安得有獅子吼耶時余在燕日擊

其事詎可以迴會稽閭秀乎

四庫全書
女子名李秀

小青名玄玄傳者隱其姓或曰姓馮維揚人母爲女

塾師小青因涉獵書史能詩嫁武林豪公子公子

婦奇妬小青不得意死死時在壬子始十八詩稿

爲婦餘妬所焚故名其稿之餘曰焚餘余采其佳

者著後云稽首慈雲大士前莫生西土莫生天願

爲一滴楊枝水灑作人間並蒂蓮 春衫血淚點

輕紗吹入林逋處士家嶺上梅花三百樹一時應

變杜鵑花 新粧竟與畫圖爭知在昭陽第幾名
瘦影自臨春水照卿須憐我我憐卿 何處雙禽
集畫闌朱朱翠翠似青鸞如今幾箇憐文彩也向
秋風鬪羽翰 脈脈溶溶灩灩波芙蓉睡醒欲如
何妾映鏡中花映水不知秋思落誰多 鄉心不
畏兩峯高昨夜慈親入夢遙說是浙江潮有信浙
潮爭似廣陵潮 百結迴腸寫淚痕重來惟有舊
朱門夕陽一片桃花影知是亭亭倩女魂詩原未
注題惟新粧一首署默默兩字

朱玉耶郭聖僕妾艷質善詩其空庭閒思二十首中
有云桐樹花香氣似雲最堪憐處映斜暝馮誰報
取君同賞可惜桐花滿地分又云未利何情傍晚
閑喚華遶樹百千迴侍兒不會遲留意呵叫分華
睡去來殊有韻致

李宗定姬人劉玄芝字秀生秣陵人作宮詞百首余
采其三十七首傳之好事詩云月明如水浸宮寒
宮裏佳人衣尚單徧賜錦袍多得御御時穿與內
家看 桃花未落李花開艷李濃桃各自媒須惜

春風好光景等閒去了不重來 誰是宮中第一
行秋衣欲着預添香舞時能使風吹透飄山仙仙
繡帶長 秋風搖落院中生刺繡佳人無奈情盡
幌夜來渾不寐愁聽亂葉打風聲 金鞍玉勒珊
瑚鞭騎向雲車五色前斜鬢不關曾墮馬時新粧
束髻兒偏 白玉梨花白雪香官家賜酒洗新粧
謝恩未了傳呼急上殿吹笙學鳳皇 芙蓉花映
遠山眉舌小如簧巧若吹暗裏隔花輕笑語乍疑
枝上轉黃鸝翠雲裘進尚衣官聖主因憐舞女寒

催進吳綾與蜀錦民間辛苦不曾寬
蘭湯浴罷

試新衣著拜簾前嬌力微雨雨侍兒扶不起如山

恩重古來稀
爲言消妬殺倉庚捕盡虞人調大

烹長鎖何曾見小寵幽宮猶賜一盃羹
羅衣長

袖製時新曾入昭陽作舞人久放筵中絨不取悲

秋強過又愁春
珠簾乍捲水芝香水殿風來晚

更涼對月無言看綉扇秋來收拾入深箱
白玉

爲樓貯玉姬杏花天氣醉腰肢扶牀三起凡三覆

終是嬌嬈不可持
聚聚蘭葉浦堦紅老大青娥

一半空尚有數人道舊主宮桃花柳盡春風上
陽宮冷葉紅飄高閣朝元秋雨宵獨抱錦衾愁莫
解殘燈孤影夜蕭蕭燈花紫落卽成煤好畫眉
尖置鏡臺欲畫春山纖指怯愁眉畫恐縐成堆
紫閣重重翡翠巢鴛鴦金瓦望相交琵琶聲斷紗
牕雨欲續絃無鷺血膠六位時乘駕六龍蒼蒼
春色仗前岑露染旌旗猶帶濕千官早候景陽鐘
臘雪初殘睡欲遲寒瓶久坐有冰澌侍兒忽報三
更月已上梅花三兩枝茶沸銅爐烟較青三更

夜氣冷銀屏推窗惟見濛濛月失却牽牛織女星
金獸頻添沉水香錦衾熏蓋合歡牀當年樂易東
方白今夜天長不見光雪深三尺擁宮門一片
瑤階無履痕瞥見華清多樂事鎖簧難禁夢中魂
小苑梅花綻九英相看忽地不勝情千重久斷東
君轅春色緣何向內生溶溶春氣月娟娟雲淡
風收丙夜前玉簫何方聲漸近梅花吹散殿簷邊
日射黃金榜上頭佳人相對不勝愁縈迴柔燠千
條柳惹落桃花水下流玉墀春草傍階生幾樹

梅花四照明抱得秦箏樓上坐含愁彈得兩三聲
長毛獬子雪兒名紅毯安眠未受驚鳥喚鴉飛花
瓣落輕狂常吠不停聲 水下桃花片片紅枝頭
判別浪頭逢非開老去銷顏色總是空園一夜風
上林百頃曉鶯啼仗下花明駿馬嘶時令當行移
玉輦歸來寢殿日沉西 轉餉民膏百萬錢鍊衣
猶冷艷陽天君王寄語裁縫女每製征袍多着綿
經撫新聞共被收白頭司馬秉吳鉤退朝才記成
都戍又報三苗奪貴州 西臺日夜進封章彈劾

多從口舌長市馬招兵勞氣力六年猶未見勤王
蛾眉花貌枉由然得見天顏若上天欲向良宵薦
梳席掌官常索五千錢桃李無枝不着花粧成
轉騰闌好華腰肢好學風前柳數米何如楚國娃
如今行樂事偏優不似襄王夢裏遊雲雨巫山神
女下後身現在殿西頭關草閒時共奕棋奉朝
且遣悶懷思游嬉未覺迴來晚月上雕欄花影移
萬幾多暇入宮蓮御女行方按四時宮幸真成天
上貴輕敲檀板製新詞

林娘者漳人隨所私奔至楓亭私者爲官較所捉林
怨望作詞詞不甚暢已知所私在獄作詞寄之曰
妾怨君君怨妾如此良姻成惡業昔日盤旋水與
山今日相思一指間怨怨復何言秋風起徒斷
魂亦有才者而薄命可惜

朱素娥名斗兒桃葉伎送所懽詩云楊子江頭送玉
郎離思牽挽柳絲長柳絲挽得吾郎住再向江頭
種幾行又托所懽買束腰其人寄問短長朱答之
云寄買紅綾束如何問短長妾身君抱裏尺寸細

思量

徐翩翩字驚鴻桃葉伎能詩而且有俠骨顧太學行
翩翩送至燕子磯顧持一詩扇尚空數行曰卿寧
無一詩送我乎翩翩立填其白云一日發江口五
日下長洲可惜送君淚不隨江水流顧長洲人見
之驚服翩翩後嫁江陰郁文叔文叔死復還秣陵
削髮爲尼居簾子營小庵時齒髮已暮矣余每欲
同程孺文往看因循不果旋聞下世遍索其稿而
不得爲之惋惜云

徐翩翩嘗雅集分韻見陸成叔詩蛺蝶淡黃裙句大
擊賞卽贈以百金成叔後來萬金之富皆權輿於
此時方尚蛺蝶裙

趙四娘名衫姬字今燕桃葉伎所交多名士後老居
琵琶巷口每閉門曰閉門趙常教授女流所著詩
冒伯璠爲選之如送別森森春江上孤舟去莫留
思君若流水日夕伴行舟 送王仲房還新安慕
雪江南路城孤尊酒期殷勤折楊柳還向去年枝
見燕獨坐掩羅幃愁看雙燕飛思君不如燕一

歲一來歸 古意河邊楊柳樹枝葉何裊裊一朝
花落飛東西不相保人生會晤難別離何太蚤昔
爲連理枝今爲斷腸草瞻念當時歡相思令人老
和桃源人去絳帳寒云桃源人去絳帳寒強折
花枝帶笑看月上梅梢空有影風吹柳絮不成團
暮春江上送別一片潮聲下石頭紅亭送客使
人愁可憐垂柳絲千尺不爲春江綰去舟 送張
幼于還吳門花前雙淚濕衣裾把酒紅亭落日餘
此去吳天霜橘滿逢人好寄洞庭書 寄陳八玉

英時留姑蘇何事簫聲獨上樓傷心桃葉水空流
一從南國香銷後誰復佳人似莫愁 代客答曾
傳錦字寄相思夢裏行雲未有期不及多情花上
月隔牆偏照最繁枝 送沈嘉則游廣陵秋風吹
送木蘭舟處處青山待隱侯莫向尊前歌玉樹揚
州花月使人愁 憶故居柳絮香泥玉壘封珠簾
深鎖暮烟濃分明記得雙棲處夢繞青樓十二重
馬守真字月嬌小字玄兒以善畫蘭號湘蘭子又稱
四娘居舊院石橋輕貨重諾王百穀謂爲翠袖朱

家紅粧季布唯是伎籍中名最起番君須長無不
知有湘蘭者余見馬姬時年已五十七猶塗脂傅
粉作少年冶態是歲盡室入吳爲百穀壽歸卽物
化姬舊有稿二冊今散落僅見冒伯璆所選四美
人數首耳中如自君之出矣不復舉瓊卮酒是消
愁物能消幾箇時誦之猶令人酸楚

馬大者名如玉桃葉伎脚不減老四娘桃花結子後
面又雀斑矣善楷書詩英英有致國華王孫社中
人也能對客刻燭刻韻膏有刻稿今覓之不得只

記其池頭賞牡丹詩云楊家姊妹擁匡牀露下微
聞笑語香似欲令人魂夢斷齊臨晚鏡競新粧

郝文珠字昭文珠市伎面有雀斑然爲人文弱清致
逼人余嘗在其齋頭見信筆作報札頃刻數百言
字不減黃庭信佳秀也後嫁遼左李通侯家奴邯
鄲才人爲廝養婦鄰女多惜之詩多佳不復記記
其送陳孝廉大還云無言共聽離鴻淚妾倚闌干
君上馬

郝文珠詩散失不可復得然於張隆父扇頭見其所

作聽經行聊存之以當告羊云詩云年來戶外可
張羅間寂那經車馬過繡幕閒垂銀蒜冷珠簾
捲網塵多囊槩匣鏡幾曾理鳳瑟鸞笙絕里耳漠
漠寸心寒似冰瀟瀟四壁清如水焚香趺坐草蒲
團有身無處覓心安使君爲揭波羅諦等閑塗我
白旂檀旂檀一嗅餘馨遠彷彿到天奏雲巘色空
空色兩如如淨盡六根棲柰苑柰苑祇園常曉夢
粉碎虛空無罣碍何當長笑謝紅塵頂禮皈依觀

自在

薛素素嘉興伎有十能善詩善書善畫善琴善奕善
簫而走馬射彈則其絕技也壬寅中秋馮開之徐
茂吳大集西湖月光如水素素自秀水駕一艇跡
之五鼓會於六橋亦豪舉已嘗見其懷人作云良
夜思君歸不歸孤燈照客影微微携來獨枕誰相
問明月空庭淚濕衣

范夫人徐小淑贈薛素素詩連城聲價舊名姬養紙
芙蓉雙粉奇綠筆揮雲誇濯錦誰言蜀女擅稱詩
幽蘭九畹墨華淋走馬章臺彈撲金却買輕車

駕油壁西陵松下結同心 雙彎嬌襯步蓮生一
束蠻腰舞掌輕乍倚東風力不勝素華纖霧月中
盈 花神俠骨氣縱橫學寫蠻粧向魏城手把龍
文談虎畧胸羅十萬薛嵩兵 重開別院貯文君
寶絳千金換翠裙非雨非雲香滿路前身應是薛
靈芸皆素素實錄也

景翩翩字驚鴻閩名伎也嫁丁長發丁爲人誣訟于
官景聞之狼狽自經因寄白巾與丁訣并寄一詩
云別君妾魂斷白巾是妾魂出入懷君袖歸來拭

淚痕景時以救而活丁亦事白然後一年景竟死
結語遂成讖語

丁長發客秣陵景翩翩病將革剪指髮并作一詩寄
丁今眎其髮長可四尺猶光澤可愛詩尤婉致動
人詩云憶郎別時妾顏好別來日漸成枯槁大藥
由來不護身一命湏臾竟難保剪茲指髮涕交垂
千里題緘寄所思生魂死魂未與指髮長相隨隨
郎出入懷郎袖莫似生前輕別離

鄭妥名如英字無美桃葉伎能對客揮毫數百言立

就但齋儉故名稱稍遜湘君所著詩如花朝玉隱
園芳辰羣卉茁勝地足盤桓坐愛條風軟歡忘水
色寒雨中花氣發雲外午陰殘笑祝春光滿酣歌
酒未乾 雨中送期蓮生執手難分處前車問板
橋愁從風雨長魂爲別離銷客路雲兼樹教樓暮
與朝心旌誰復定幽夢任搖搖 秋仲湖泛晚坐
放鶴亭訪古來尋鶴秋風透薄衣羣公欣共集一
葉思將歸坐愛危亭寂行看落木飛分題慚和雪
閣筆倚斜暉 十二詩有寄曲曲迴廊十二欄風

飄羅袂怯春寒桃花帶雨如含淚只恐多情不忍
看燈下與黃裳話別起來粧罷卽黃昏愁向燈
前進別尊最怕酒闌天欲曉知君明夜宿何村
和江清極寄來韻秋盡江南草木黃美人相憶淚
沾裳客途自是愁心劇況有征鴻喚夕陽春日
寄懷黃裳月落西軒夜已闌孤衾不耐曉來寒君
情莫作花稍露纔對朝曦已便乾

朱馥名無瑕字泰玉桃葉伎居台州巷姿婉媚友人
曾談其私處墳起想之猶魄動初工楷書畫蘭後

遂能詩如芭蕉雨滴破愁中夢聽殘葉上聲新詩
題未得偏送寂寥情 賦得新月懷人萬里無雲
夕青天月一痕垂簷光尚弱低樹影猶昏別緒羅
幃冷離心寶鏡存徘徊無限意細語欲誰論 花
影繞見臨窓還傍席忽看橫檻復沾身幾欲摘來
無處摘沉吟獨立可憐春

周文嘉興伎嘗在岳使君席賦詩共用池字韻周私
謂姚叔祥曰今岳氏弟兄甚盛諸君必用池草事
須避之姚試問何以押之周答予押以差池旋諸

詩果不出周所度叔祥大快之此真有想頭者今
草艸速成不求越人者寧不心愧惜余未盡見其
作惟名媛集載其詠懷一首云幾點愁人淚不許
秋風吹吹到長江裏江流無盡期其肝腸自別矣
周今歸吳江沈會元

王微字修微小字王冠維楊妓歸茅止生後以止生
視姬人楊宛厚於已遂逸去逸時匿其親金七家
三日王素居廣廈金七屋如斗猶日坐井欄讀書
胸襟出人頭地矣所著有期山草二卷採其可意

者如左送生甫云爾別何所游月明江上舟異日
思君處憑欄看水流 偶賦月落寒流急風微桐
影斜更堪霜裏鴈飛過少年家 秋暮送蜚卿折
柳欲爲贈折時心正長柳絲渾未斷先已斷人腸
過宛叔夢閣照返江流急霜多楓葉殘年年月
光好只共一閑寒 初冬拜孫太初墓松逕看成
遠烟寒鳥一鳴應知泉下客仍在此山行 秋夜
送別握手應無語離亭日漸過霜寒天不曙月好
夢無多莫言君去急妾思逐流波 秋夜淒切秋

聲重絡絲入檐殘月似蛾眉愁心不逐閒雲散長
比寒溝月照時 昌化道中作照返烟溪樹影斜
千山含翠暮雲遮年來已自多愁緒古道無人更
落花 新秋賦送止生東歸月落寒江烟水空荻
花楓葉自然清砧聲未動腸先斷不待孤鴻天外
鳴 宮怨一往心期似夢中三春已付落花風君
王苦禁東流水舊恨新愁總不通 戲代憶昔花
前目應時今來如夢復如思縱然他日能相見結
得同心應已遲 夢宛叔泉聲乍遠雨聲聞殘睡

昏昏夢到君最是夢醒無意緒暗推窗看水邊雲
湖上早起中流何處聽雞鳴只看船窗烟霧生
剛到五更偏睡去急披衣起已天明懷宛叔不
見因生夢見心自愁孤枕與孤衾如何永夜曾無
寐悔向湖邊獨獨尋同太史過湖上未幾先歸
予獨湖上苦雨感賦愁風一葉打輕鷗消受湖光
十日留閒自不留閒自住償他寒雨數番愁代
宛叔寄止生月自明愁自生分飛雖已慣長歎若
爲情月入疎簾桐影薄幽思應怯洞簫聲中秋

賦戲苑叔霜滿枝月滿枝彷彿孤衾薄徘徊枕
遲年年此夜翻成恨落盡芙蓉知不知 春夜送
止生東歸調得長相思未花殘惜花殘月落江潭
烟水寒離恨欲無端試凭欄怯凭欄帆驅雲際路
漫漫何人上木蘭

蔡清卿名彬別字弱雲廣陵人母夢白衣女人持隻
繡授之而生幼棄五輩父以貧故携之長安令學
歌舞清卿肝膽並裂遂失明久之夢見白衣女人
曰視我鏡旋從羣兒戲壁間摸得物之似鏡者照

之雙眸復明因工琴奕蘭竹怪石尤善韻言如自
君之出矣云自君之出矣憂君結中腸縱有寒衣
寄難銷驛路霜 莫春病起春色拋人易堪憐也
病中入樓驚暗綠拂檻惜殘紅柳重仍霑雨花留
欲趁風薄寒侵瘦骨猶自坐簾櫳 覽鏡感懷怕
聽流鶯歷亂啼日高猶自掩香閨蛾眉減盡春纔
半誰寄相思到五溪 贈別二首傷情不柰出宜
春遙見離亭倍慘神昨夜樓頭好明月今宵分照
遠行人一鞭行色馬駸駸欲挽垂楊意不禁何事

橋南千萬剎能遮望眼不遮心
竹枝詞飄花落
葉任東風蝶怨鶯愁殺儂自是紅英難寄語枉
教人在斷腸中
楊柳春風初試小鵝黃漸覺青
青拂苑牆葉亂曉烟輕帶雨花飛晴雪細生香吹
殘塞曲征夫淚描就宮娥少婦妝莫折長條對樽
酒堤邊都是別離腸

王素如真定人小字金哥原張姓爲人掠賣於王居
長安青樓卜介父昵之嘗效丁六娘十索詩與介
父云寒月下幽窗秋風入羅幔初起傍粧樓弊衣

不掩飢欲裁合歡襦索君錦繡段介父喜其文雅
以潯陽琵琶婦諷之素如作天長地久詞曰羅帳
方夜永章臺日又遲並飛原有翼連理自生枝海
水無枯日南山豈化塵不須論浩劫長作合歡人
如此願致介父儻不成其願負此良友矣

在翠容晉產居長安青樓與姜師肯狎後師肯之友
張起叔挑之翠容答之以歌曰昨日對故人今朝
逢新好寧知眼前花不及路傍草起叔大喜其文
與定情焉

任翔雲翠容女弟也卜介父諸人嘗集其家翔雲方
按拍欲歌舊歌花非花客曰見新人不宜歌舊詞
翔雲遽應聲曰花非花葉非葉久傾情乍相接傾
情莫作負情儂相接還成薄命妾如此文情乃若
蓮花之在污泥惜夫

王金字麗生珠市伎其人白皙修艷嘗病起東馮化
之云宿疴才減喜新晴侍女添香炙鳳笙欲睡且
慵臨錦坐東風吹送賣花聲

梁小玉東吳伎七歲能詩所著有瑯嬛集二卷其立

夏前一日詩云低低問春色明日歸何處是爾帶
愁來何不將愁去雜咏云憑春常買夜問月欲賒
晴接葉看鶯宿携柑聽鳩鳴虞美人云貞魂化作
芳園草不逐東風入漢宮夜舞云目送檀郎眉欲
語不知舞錯夢輪袍皆到語

是他春帶愁來春歸何處却不解帶將愁去又云貪
與蕭郎眉語不知舞錯伊州梁小玉立夏前一日
及夜舞詩意本此可謂曲中偷香手也

方伯文有八音杯余嘗以八音爲詩同作者多難愜

意見瑯嬛集中自咏二首殊穩貼詩云金谷曾聞
貯綠珠石家風味近何如絲桐邀月清音迴竹通
通泉冷韻餘匏葉行觴消壘塊土花繞砌咲瓊裾
革除塵念心如洗木筆新題錦字書 金屋何須
貯阿嬌石巖深處更玄超絲竿釣水拖霜練竹逕
遮雲護翠綃匏酌幾行香骨醉土菰連畝野厨饒
韋家釀法還留譜木落庭空仗此銷

沙嶽名寔在字未央桃葉伎善絃管工楷書著蝶香
集馮化之爲刻閨情百首如梅花一樹照清池疎

影涓涓聽月移不是暗香叅鼻觀渾疑萬蝶抱空
枝 今年青帝政因循小雨輕寒釀好春草氣花
香憐淡漠應知愁殺路青人 迅速狂風捲地塵
嬋娟盤外折蒼筠香閨深處心猶怯愁殺江頭渡
水人 檢到匡廬勝槩圖峯名載道有香爐不知
石罅雲生處得似旃檀氣味無 朝來報到牡丹
開拚取紅紗護錦堆疑蝶貪香尋不得遶兒衣袂
万千回 秋水澄鮮浸碧虛鸕鷀一隻下灘徐拋
將錦石相驚起恐啄閒遊比目魚

郝賽名姹然字蕊珠珠市伎麗客媚態楷書有昭文
門風著調鸚鵡集如作畫濡筆染羣花春工生紙上
難描蝴蝶情兩兩飛相向 筆顏戲成欲作意中
書須倩管文子渠亦解相思筆筆雙釣起 看梅
一樹梅初放三朝峰正來青尊與紅板應不憚頻
催 夜成帷燈青閃爍斗帳錦斑斕春夢不知險
悠然度幾山 自題畫扇水環幽澗曲山定野雲
閒何處菰蒲客臨風曳杖還 午睡解冠家姊妹
嘲爲破朝寒酒一盃醉眠午晌未醒來隣家女伴

偏多事憶舊懷新各浪猜
扇繪嫩絲池塘藏睡
鴨淡黃楊柳帶栖鴉
圓賦方塘檻畔是垂楊
鴨翼斑斕鴉口黃
各各夜來俱有夢不知若箇到西墻
春陰風遞微寒入小樓
添香獨坐聽鳴鳩
六街院落燒燈罷
冷雨絲絲織暮愁
夜坐東閣初生月
一帘花叢簌簌影離離
帷中侍女挑燈久
夜色牽人欲卧遲
郊遊晴雲淡淡日暉暉
黃鳥間關白鷺飛
一路東風如有意
亂吹花片拂人衣
鳳凰臺雨過荒臺春草長
浮雲暗處是斜陽
杏花零

落知多少黃蝶飛飛野菜香 次韻答淡如瀟灑

深閨春又中相憐相憶夢相通穠花半隱初生月

嫩柳難禁乍起風 題美人畫惆悵多情一見難

海棠如醉倚雕欄恐驚花下雙棲蝶斜抱雲和不

忍彈 東閣簷端風靜鳥聲恬東閣初暘滿繡簾

不到小窗才兩日海棠如綺照香奩 豔辭春威

酒力助情酣欲滅銀燈怯乍歡的一莖開兩穗

含羞帶笑挽郎看 春初同張却林小酌賦小院

莓苔碧漸回春風春日舉春杯閒庭有石雲常住

芳樹無花蝶偶來 秋閨清宵感感歛雙蛾門外
西風戰敗荷秋老最傷人去久天寒偏覺鴈來多
清嘯圍同未央淡如賦名園風日快斜暉滿地春
苔繡碧文乳燕雛鶯能宛轉落英飛絮故紛紜池
邊瘦石森如樹天外寒山淡似雲行過小橋新水
活轆轤聲細隔花聞

李大名貞蟻字淡如桃葉伎工畫書著韻芳集如語
游絲作低聲語游絲勿逐兒衣袂倩子連綿情好
把郎心繫 游絲答絲微不敵緣力鈔還輸予斜

陽風起時儂亦芬無緒 畱春舉袂攬東風願作
須臾住莫學薄情郎陡地拋人去 題美人垂釣
圖纖手約文竿獨釣清溪水爲思尺素書願言得
雙鯉 芳樹小院饒芳樹春來花事穠夢香憐睡
蝶魂飽羨游蜂 薄暮薄暮坐虛堂中懷殊耿耿
清風故入簾吹我衣裳冷 午日同諸姊妹戲艾
虎新雕巧蘭湯舊事仍遼陽烽火惡好繫辟兵繒
春朝花下西廡日曛曛倚欄成小憇天清風力
微花氣撲衣袂 題沙未央畫近水綠不了遠山

青可憐漁舟棲泊處多在酒旗邊 古意薄倖將

何擬含淒欲問天乍同雲漸淡難望月恒圓 移

花謔手自移萱草殷勤貯小樓周郎花與妾若箇

可忘憂 題雲散比凝烟曉乍分積同堆絮自糾

紛巫山有夢能留客不分人將薄擬君 春愁寄

未央小池新浪乍融泥暖日暉暉照畫題無奈東

風交不得吹愁只遣到深閨 月夜有懷不見風

前舊令君滿庭霜月白於雲仙居只隔清溪曲此

夜鐘聲應共聞 元妹初破瓜戲貽之南窗簷下

經時房競採春花醺蜜房昨夜風狂歸不得朝來
一箇已銷黃 晚春寄蕤珠漫空小雨細於塵杜
宇聲聲柳色新莫道落紅無意緒撲簾偏覺惜花
人 沙嫩以下或疑倩手此輩靈心慧性耽書籍
如脂粉弄筆硯若繡牀謂湘靈不解鼓瑟誰其信
之錄之令冶遊者柔腸寸斷

米元章謂蔡襄勒字沈遼排字黃庭堅描字蘇軾畫
字臣刷字余謂今人皆描詩唯袁中郎可免此語
能始體似描意不描伯敬似袁孟和似曹

今人皆排詩佳者爲描詩縱意自如者爲畫詩

作詩須有警語未經人道方能傳遠若拾人牙後已
披之華何足奪目余有元日江行詩春聲得野雀
歸意競江鴻不道芳年改還添衰髯中自謂無所
蹈襲矣然唐太宗首春詩寒隨窮律變春逐鳥聲
聞劉長卿元日詩律變滄江外年加白髮中則余
向作總不出古人範圍矣安得佳

詩景須在有無之間著相則不佳杜拾遺緇衣挂蘿
薛涼月白紛紛此在有相無相之間紛紛二字只

可如此用之若野花乾更落風處急紛紛已稍著
相至坐客醉紛紛則俗矣

壬寅仲春西湖戲樓船鏡中笙歌鼎沸一貴人手持
檀板自倚曲忽言緊字入曲則佳入詩則否余應
之曰霜露一何緊桂枝生自直未始不佳

賈島作詩因敲推二字未定今人輒謂改詩爲敲推
又因敲推謂敲詩湯太史台州東湖詩云詩敲一
字賜俱改茗鬪三班舌幾回詩可改安可敲唐絕
之所謂卧對南山改舊詩當矣

余有寄朱文寧太史詩花樹重重圍彩筆綠楊處處
絆羅襪友人高彥升謂襪者馬貼脊物積毛而成
安有羅錦此以措大眼孔抹殺富貴景象不知宰
相賜繡寶相花襪金羈玉勒繡羅襪已載韻府矣
又儒林公議云看狀元者錦襪繡較角逐爭先長
吉詩銀襪刺麒麟誰人織錦襪則用此已夥豈盡
未見耶

余嘗有蕩子婦詩寫月翻悲月嗔君復念君新愁當
紫燕舊淚檢紅裙夢易迷蘭渚書難寄錦文敢云

心似雪留得髩如雲第三字皆用單字初疑之此
閱唐人詩如楊炯送豐城王少府詩愁結亂如麻
長天照落霞離亭隱喬樹溝水浸平沙左尉才何
屈東關望漸賒行看轉牛斗持此報張華又如炯
驄馬王勃重別薛華韋承慶凌朝浮江旅思沈佺
期長門怨蓋多有之

余作九日烏龍潭登高詩盡是它鄉客同開九日樽
登山如出郭依樹自成村遠磬過潭水秋暉半野
園霜華涼葉下澗影晚霞翻戲馬茲追滕驪駒獨

愴魂當筵正懷土寂寂竟何言暫能始謂余試攷
唐人詩恐成村野爾兩聯韻脚皆實乎蓋五彩成
章一濃一淡一實一虛此詩律之正法也然余閱
王德貞奉和聖製過溫湯詩握圖開萬宿屬聖啓
千年驪阜疏縱騎驚鴻映綵旂玉霜明嶽野金障
藻龍川祥燿聚危岫德水溢飛泉停輿興睿覽還
舉大風篇又如王濯清明日賜百官火詩薛元超
奉和同太子監守違戀緒遂良安德山池宴集王
勃三月曲水宴陳子昂入峭峽安居溪伐木蘇頲

和聖製幸寶希玠宅張子容辟池望秋月劉長卿
栖霞寺東峰諸詩兩三聯連用實脚者蓋亦多矣
里中方園牆外盡古松中結一亭曰聽濤曾偶集作
聽濤詩聽聽初尋勝江濤若撼巖聲多出松杪秋
只隔青杉孤鶴棲春艇層山落夜帆好風吹不斷
的的濕衣衫因憶能始言恐四韻並實旋檢唐人
王維過香積寺詩不知香積寺數里入雲峰古木
無人還深山何處鍾泉聲咽危石日色冷青松薄
暮歸潭曲安禪制毒龍又如維送李判官赴江東

沈佺期長門怨孟浩然赴京途中遇雪岑參送任
中郎出守明州送揚州王司馬王昌齡客廣陵諸
詩四韻用實往往有之

七言律亦有四韻用實者如錢起登劉賓客高齋詩
能以功成疎寵仕不將心賞負雲霞林間客散孫
弘閣城上山宏綺季家胡蝶晴連池岸草黃鸝晚
出柳園花日陪鯉也超文苑誰道門生隔絳紗又
如郎士元酬王季友題半日村別業張南史陸勝
宅秋雨探韻于鵠送宮人入道李商隱九成宮

溫庭筠休澣日謁西掖所知諸詩往往而是

五言詩有五字皆實者如劉孝綽釣竿篇金轄茱萸
網銀鈎翡翠竿是也七言詩七字皆實則少如劉
孝威賦得香出衣云香縷麝帶逢金縷璫花玉勝
纈珠微鮑照白紵詞云洛陽少童邯鄲女秦箏趙
瑟挾笙竿古東飛伯勞歌云羅帷綺帳脂粉香只
六字實若七字實記得柏梁臺枇杷橘栗桃李梅
吳均行路難冰羅霧縠象牙席耳

五言律詩首二句平起卽宜並用平如湓城潮不到

是也然亦有路遙雲共水扣門無犬吠而路與扣
字之類多不用平以問數人皆云唐人多不忌此
亦不妨問所以然則不能答殊不知此惟一三五
七句不忌若二四六八句卽忌矣如秋來未著花
年衰憶故鄉皆一定不可移易於此處苟第一字
借仄第三字卽宜用平以應之如弄花香滿衣愧
君相見頻只應持釣竿是也未可槩以爲不妨矣
七言律二四六八句三四平聲準五言之平起如第
三字借仄第五字亦宜用平劉滄半夜月明潮自

來却憶舊居明月溪蕭寺竹聲來晚風黃菊清籬
應未凋隔水數聲何處鍾皆足爲詩家粉本

余嘗有絕句寶刀半蝕氣淋漓慙逐幽燕輕薄兒平
起寶字用仄第三字卽宜用平如日長風暖柳青
青是也此七言一定之法許長嘗以爲言第古
人亦有之如樹頭樹底覓殘紅綠楊陌上送行人
近來中酒起常遲皆是也蓋以起句又不必拘耳
若二四六八句卽難假借

刪詩正樂雅頌得所孔子山人之領袖也轍跡周流

席不暇暖孔子游客之先鋒也幸生叔簡之前吾知免夫

孔子曰吾自衛反魯然後樂正雅頌各得其所今呂叔簡謂詩無關於天下國家無益於心身性命是欲廢詩矣如欲廢詩亦必廢樂樂既崩禮亦壞禮壞則子可弑父臣可弑君山行水止天入地中可不思夫

呂子嘗詩是欲天一於日而不必以月以星也一於雨而不必以霜以露以風以霧也地一於田而不

必以山以埳也水一於河而不必以淵以澤以池
以沼也時一於春而不必以夏以秋以冬也人一
於溺而不必以涕以淚以津以汗也人只有其口
其目其耳而不必有麋有須有髮也目亦留其一
耳不必有兩何以故以類推之皆無用者也